

Na osnovu člana 48., člana 31. stav (1) i člana 36. stav (2) Zakona o porezu na dohodak („Službene novine Federacije BiH“, br. 10/08, 9/10, 44/11 i 7/13), federalni ministar finansija - federalni ministar financija, d o n o s i

P R A V I L N I K

O IZMJENAMA I DOPUNAMA PRAVILNIKA O PRIMJENI ZAKONA O POREZU NA DOHODAK

Član 1.

U Pravilniku o primjeni Zakona o porezu na dohodak ("Službene novine Federacije BiH", br. 67/08, 4/10, 86/10, 10/11, 53/11 i 20/12), u članu 1. stav (1), iza riječi: "amortizacije", riječi: "oblik i sadržaj evidencija o dobitcima koji se daju u nagradnim igrama i igrama na sreću", brišu se.

U stavu (2), iza riječi: "kapitala", zarez i riječi: "dobitke nagradnih igara i igara na sreću", brišu se.

Član 2.

U članu 2. iza stava (1) dodaju se novi st. (2), (3) i (4) koji glase:

" (2) Pored rezidenata Federacije iz člana 2. stav (3) Zakona, obveznicima poreza na dohodak u smislu člana 2. stav (1) tačka 1) Zakona, smatraju se i ona fizička lica koja imaju prebivalište na teritoriji Republike Srpske i/ili Brčko Distrikta, ako dohodak od obavljanja nesamostalne djelatnosti ostvaruju kao zaposlenici kod pravnog ili fizičkog lica koje ima sjedište na području Federacije.

(3) Fizička lica – zaposlenici, koji se, u smislu stava (2) ovog člana, smatraju rezidentnim poreznim obveznicima u Federaciji, obveznici su poreza na dohodak koji ostvare obavljanjem nesamostalne djelatnosti kod jednog ili više poslodavaca koji imaju sjedište na području Federacije. Obračunavanje i plaćanje mjesečnih akontacija poreza na dohodak od nesamostalne djelatnosti za ova fizička lica vrši se na način propisan odredbama člana 27. Zakona i odredbama čl. 16. i 17. ovog Pravilnika. Za ove porezne obveznike poslodavac je, shodno odredbama člana 37. stav (2) Zakona odnosno člana 21. stav (4) Pravilnika, dužan mjesečne akontacije poreza na dohodak uplaćivati na propisane račune za uplatu javnih prihoda prema mjestu gdje se nalazi sjedište poslodavca odnosno isplatioca prihoda od nesamostalne djelatnosti.

(4) Fizička lica iz stava (3) ovog člana, shodno odredbama Zakona o porezu na dohodak, pored poreza na dohodak od nesamostalne djelatnosti, obveznici su i poreza na dohodak koji u toku poreznog perioda ostvare na području Federacije obavljanjem samostalnih djelatnosti iz člana 12. stav (2), tač. 1), 2) i 3), kao i obavljanjem drugih samostalnih djelatnosti iz člana 12. stav (4) Zakona. Poslodavac odnosno isplatilac dužan je za ove porezne obveznike prilikom isplate prihoda po ovom osnovu,

obračunati, obustaviti i na propisane račune uplatiti akontaciju poreza na dohodak i to prema mjestu gdje se nalazi sjedište poslodavca odnosno isplatioca prihoda."

Dosadašnji stav (2) postaje stav (5).

U dosadašnjem stavu (2) koji postaje stav (5), u zagradi iza broja "28/04" veznik " i " zamjenjuje se zarezom a iza broja "57/09" dodaju se riječi: " 40/10 i 27/12").

Član 3.

U članu 4. , iza stava (2) dodaje se novi stav (3), koji glasi:

" (3) U skladu sa tačkom 9) člana 5. Zakona, osigurane sume ili druge naknade šteta načinjenih na imovini, a koje su isplaćene u iznosu koji je utrošen za zamjenu ili popravku oštećene imovine, "

Dosadašnji st. (3) i (4) postaju st. (4) i (5).

Iza stava (4) koji je postao stav (5) dodaje se novi stav (6), koji glasi:

" (6) U skladu sa tačkom 13) člana 5. Zakona, dobici u novcu, stvarima, pravima ili uslugama, koje ostvari fizičko lice učešćem u igrama na sreću i nagradnim igrama, na koje se porez obračunava i plaća pri isplati ili uručenju dobitka, na osnovu federalnih ili kantonalnih propisa o igrama na sreću i nagradnim igrama."

Član 4.

U članu 5., dodaju se st. (2) i (3), koji glase:

" (2) U skladu sa tačkom 12) člana 6. Zakona, porez na dohodak ne plaća se na zatezne kamate koje poslodavac isplati zaposleniku ili bivšem zaposleniku na osnovu odluke(a) nadležnog(ih) suda(ova) na naknadno isplaćene plaće ili razlike plaća.

(3) U skladu sa tačkom 13) člana 6. Zakona, porez na dohodak ne plaća se na prihod od premija životnog osiguranja koji imaju karakter štednje i/ili dobrovoljnog penzijskog osiguranja, koji su isplaćeni korisniku osiguranja od strane društva za osiguranje i reosiguranje sa sjedištem na teritoriji Federacije, pod uslovom da su u toku perioda osiguranja premije uplaćivane od strane korisnika osiguranja od njegovih primanja na koja su prethodno bili obračunati i plaćeni obavezni doprinosi i porez na dohodak. "

Član 5.

U članu 6. , stav (1) , tač. 4. i 5., brišu se.

U stavu (2), riječi: " člana 27. stav (6), zamjenjuju se riječima "člana 27. stav (7)".

Član 6.

U članu 11. stav (2), iza tačke 2. dodaje se nova tačka 3. koja glasi:

" 3. prihodi koje poslodavac isplati zaposleniku ili bivšem zaposleniku na osnovu pravosnažne sudske presude, a koji se odnose na naknadnu isplatu plaće(a) ili razlike(a) plaće(a) iz proteklih poreznih perioda, osim iznosa koji se odnose na obračunate i isplaćene zatezne kamate."

Dosadašnja tačka 3. postaje tačka 4.

Član 7.

U članu 15. stav (1), iza tačke 4) dodaje se nova tačka 5), koja glasi:

" 5) premije kolektivnog osiguranja koje za svoje uposlenike uplaćuje poslodavac za slučajevne povreda na radnom mjestu i/ili pri dolasku i povratku sa posla."

Član 8.

U članu 16. stav (1), mijenja se i glasi:

" (1) Akontacija poreza na dohodak od nesamostalne djelatnosti za zaposlenike – rezidente iz člana 2. st. (3) i (4) Zakona, obračunava se mjesečno primjenom stope iz člana 9. Zakona, na poreznu osnovicu koju čine svi oporezivi prihodi od nesamostalne djelatnosti koje je zaposlenik ostvario kod svog poslodavca u tom mjesecu, umanjeni za obračunate i uplaćene obavezne doprinose iz osnovice i za mjesečni iznos ličnog odbitka utvrđenog na osnovu odredbi člana 24. st. (1) do (5) Zakona, a na osnovu utvrđenog faktora ličnog odbitka iz porezne kartice poreznog obveznika, ako je ista pribavljena od federalne Porezne uprave i dostavljena poslodavcu."

Član 9.

U članu 18. stav (1), iza riječi: "rezidenta" dodaju se riječi: " iz člana 2. st. (3) i (4) Zakona,"

U stavu (3), iza riječi: "radni odnos", dodaju se riječi: "sa poslodavcem koji ima sjedište na području Federacije,"

U stavu (8) tačka b) mijenja se i glasi:

"b) u smislu odredbi člana 2. st. (3) i/ili (4) Zakona, prestala biti rezidenti Federacije;"

Iza stava (8) dodaje se novi stav (9), koji glasi:

" (9) Kada u toku ili po isteku poreznog perioda rezidentu iz člana 2. stav (4) Zakona, prestane radni odnos kod poslodavca koji ima sjedište na području Federacije,

od prvog dana u mjesecu koji slijedi nakon prestanka radnog odnosa to fizičko lice gubi status rezidenta Federacije, a time i pravo na daljnje korišćenje prava na lične odbitke po osnovu porezne kartice. Poslodavac kod kojeg je to lice bilo u radnom odnosu, dužan je o prestanku radnog odnosa tog lica obavijestiti Poreznu upravu u roku 5 dana od dana prestanka radnog odnosa radi poništavanja porezne kartice. Ukoliko je fizičko lice kome je prestao radni odnos zasnovalo novi radni odnos kod drugog poslodavca sa sjedištem na području Federacije, tada taj porezni obveznik o tome može obavijestiti nadležnu organizacionu jedinicu Porezne uprave radi produženja važnosti porezne kartice odnosno nastavka korišćenja prava na lični odbitak i evidentiranja podataka o novom poslodavcu."

Dosadašnji stav (9) postaje stav (10).

Član 10.

U članu 19. stav (1), u uvodnoj rečenici riječi: "podnosi se" zamjenjuju se riječima:

" rezidenti Federacije iz člana 2. st. (3) i (4) Zakona, podnose "

Član 11.

U članu 20. stav (3), iza riječi: "obveznicima" ' dodaju se riječi: " iz člana 2. st. (3) i (4) Zakona,"

U stavu (8), u prvoj rečenici, iza riječi: "u poreznoj kartici," dodaju se riječi: " ili istu poništiti, "

Član 12.

U članu 22. stav (1), treća alineja mijenja se i glasi:

" - za dostavljanje godišnjih izvještaja o oporezivim prihodima od nesamostalne djelatnosti (obrazac GIP-1022) poreznom obvezniku –zaposleniku i Poreznoj upravi u skladu sa članom 28. stav (3) Zakona."

Član 13.

U članu 32. stav (1), riječi: "Zakona o obrtu (" Službene novine Federacije BiH", br. 52/02, 29/03 i 11/05)", zamjenjuju se riječima: "Zakona o obrtu i srodnim djelatnostima (" Službene novine Federacije BiH", br. 35/09 i 42/11), "

Član 14.

U Poglavlju VII podnaslov: " VII. Utvrđivanje dohotka od nagradnih igara i igara na sreću", briše se.

Član 57., briše se.

Član 15.

U članu 58. stav (1) u prvoj rečenici, iza riječi: "dohodak" kao i u drugoj rečenici iza riječi "rezidentni porezni obveznik", dodaju se riječi: " iz člana 2. st. (3) i (4) Zakona,"

U st. (6) i (7), iza riječi: "rezident Federacije" dodaju se riječi: " iz člana 2. st. (3) i (4) Zakona,"

U stavu (7), riječi: "u smislu člana 58. stav (2) ovog Pravilnika", zamjenjuju se riječima: " u smislu stava (2) ovog člana".

Stav (10) mijenja se i glasi:

" (10) Po isteku poreznog perioda, u postupku utvrđivanja godišnjeg iznosa poreza na dohodak, rezidentni porezni obveznik iz člana 2. stav (3) Zakona, na osnovu vjerodostojne dokumentacije koju treba da dostavi Poreznoj upravi uz godišnju poreznu prijavu, može uvećati svoj lični odbitak utvrđen na osnovu porezne kartice, po osnovama utvrđenim članom 24. stav (7) i (8) Zakona, tj. za troškove liječenja, nabavke ortopedskih pomagala i sl. kao i za iznos obračunatih kamata na stambeni kredit koje su plaćene tokom poreznog perioda."

Stav (11), briše se.

Dosadašnji st. (12) do (16) postaju st. (11) do (15).

Član 16.

U članu 61. stavu (1), u tački 1), uvodna rečenica mijenja se i glasi:

" 1) kod dohotka od nesamostalne djelatnosti i drugih samostalnih djelatnosti iz člana 60. tač. 1) i 3) ovog pravilnika i dohodaka iz stava (1) tačka 3) ovog člana, plaćeni porez po odbitku smatra se konačnim godišnjim porezom ako: "

U stavu (1), tačka 8), briše se.

U stavu (2), u uvodnoj rečenici, zarez iza riječi "imovine" zamjenjuje se veznikom " i " , a riječi: "dohotka od nagradnih igara i igara na sreću ", brišu se.

U stavu (2) tačka 1), riječi: " (8) i (9) " zamjenjuju se riječima: " (7) i (8) ".

Član 17.

U članu 63. stav (2), iza riječi: "Rezidentni porezni obveznici" dodaju se riječi: " iz člana 2. stav (3) Zakona,"

Iza stava (2) dodaju se novi st. (3) i (4), koji glase:

" (3) Rezidentni porezni obveznici iz člana 2. stav (4) Zakona podnose godišnju poreznu prijavu za dohodak ostvaren na području Federacije i to za dohotke od obavljanja nesamostalne djelatnosti kod jednog ili više poslodavaca, samostalne djelatnosti iz člana 12. stav (2), imovine i imovinska prava, osim na dohotke od samostalnih djelatnosti na koje se, shodno članu 31. Zakona, porez plaća u paušalnom iznosu i dohotke od imovine i imovinskih prava na koje se, shodno članu 32. st. (2), (3) i (4) Zakona, porez kao konačna porezna obaveza plaća po odbitku.

(4) Rezidentni porezni obveznici iz stava (3) ovog člana godišnju poreznu prijavu podnose organizacionoj jedinici Porezne uprave prema sjedištu poslodavca najkasnije do 31. marta tekuće godine za proteklu godinu."

Dosadanji stav (3) postaje stav (5).

Član 18.

U članu 64. stav (1), u tački 2), peta alineja koja glasi: " – dohodak od nagradnih igara i igara na sreću", briše se.

Dosadašnja alineja šest postaje alineja pet.

Član 19.

U članu 65. alineja tri, riječi: " članom 24. st. (7) – (10) " zamjenjuju se riječima: " članom 24. st. (7) i (8) ".

Član 20.

U članu 66., uvodna rečenica mijenja se i glasi:

"Porezni obveznici – rezidenti Federacije iz člana 2. st. (3) i (4) Zakona, koji Poreznoj upravi podnose godišnju poreznu prijavu, dužni su uz prijavu (obrazac GPD-1051) priložiti slijedeće:"

U stavu (1) u tački 3), riječi: " za dohodak od nagradnih igara i igara na sreću", brišu se.

U tački 4), iza riječi: "zdravstvenih usluga" dodaje se zarez i riječi: "porezni obveznici-rezidenti Federacije iz člana 2. stav (3) Zakona, uz godišnju prijavu prilažu"

Tačka 5), briše se.

Dosadašnje tač. 6) i 7) postaju tač. 5) i 6).

U tački 6) koja je postala tačka 5), iza riječi: "stambeni kredit" dodaje se zarez i riječi: "porezni obveznici-rezidenti Federacije iz člana 2. stav (3) Zakona, uz godišnju prijavu prilažu"

Član 21.

U članu 69. stav (3), riječi: " 20 dana od dana prijema zahtjeva" zamjenjuju se riječima: " 90 dana od dana isteka roka za podnošenje godišnje porezne prijave."

Član 22.

U članu 71. stav (2), tačka 4), briše se.
Tač. 5) do 9) postaju tač. 4) do 8).

Član 23.

Dosadašnji tekst i sadržaj "Uputstva za popunjavanje zahtjeva za izdavanje porezne kartice (obrazac PK-1001)", koji je sastavni dio obrasca "Zahtjev za izdavanje porezne kartice", zamjenjuje se novim tekstom, koji glasi:

" Uputstvo za popunjavanje zahtjeva za izdavanje porezne kartice (obrazac PK-1001)

Obveznici poreza na dohodak iz člana 2, st. (3) i (4) Zakona o porezu na dohodak ("Službene novine Federacije BiH", br. 10/08, 9/10, 44/11, i 7/13), koji imaju status rezidenta Federacije, a žele da ostvare pravo na osnovni lični odbitak i lične odbitke iz člana 24. st. (1) do (6) Zakona, t.j. po osnovu izdržavanja članova uže porodice i po osnovu svog invaliditeta i invaliditeta članova porodice koje izdržavaju, moraju od Porezne uprave Federacije pribaviti svoju poreznu karticu.

Zahtjev za izdavanje porezne kartice, u skladu sa odredbama člana 28. stav (1) Zakona, rezidentni obveznik poreza iz člana 2. stav (3) Zakona, podnosi organizacionoj jedinici Porezne uprave prema svom prebivalištu, a prema sjedištu svog poslodavca ako se radi o fizičkim licima koja prebivalište imaju na području Republike Srpske i/ili Brčko Distrikta, a status rezidenta Federacije stiču po osnovu radnog odnosa kod poslodavca koji ima sjedište na području Federacije BiH / član 2. stav (4) Zakona /.

Prilikom popunjavanja Zahtjeva za izdavanje porezne kartice potrebno je prije svega oznakom "X" označiti jedno od tri polja ispod naziva i oznake obrasca, ovisno od toga:

- Da li porezni obveznik prvi put podnosi Zahtjev za izdavanje kartice;
- Da li traži da mu Porezna uprava izda duplikat tj. novu poreznu karticu, jer je ranije pribavljenu poreznu karticu izgubio, ili mu je porezna kartica koju je imao ukradena ili uništena;
- Da li se Zahtjev podnosi radi trajnog poništavanja porezne kartice zbog nemogućnosti njenog daljnjeg korištenja (smrt poreznog obveznika, trajno iseljavanje u druge zemlje, sticanje statusa nerezidenta, višegodišnje odsluženje zatvorske kazne i dr.) ili gubitka statusa rezidenta Federacije fizičkog lica koje ima prebivalište na području Republike Srpske i/ili Brčko Distrikta, a zbog prestanka radnog odnosa kod poslodavca sa sjedištem na području Federacije BiH.

Obveznici poreza na dohodak iz člana 2, st. (3) i (4) Zakona o porezu na dohodak ("Službene novine Federacije BiH", br. 10/08, 9/10, 44/11, i 7/13) koji imaju status rezidenta Federacije koji žele da ostvare pravo na osnovni lični odbitak i lične odbitke po osnovu izdržavanja članova uže porodice i po osnovu svog invaliditeta i invaliditeta članova porodice koje izdržavaju koji su utvrđeni članom 24.st. (1) do (6) Zakona, moraju od Porezne uprave Federacije pribaviti svoju poreznu karticu.

Popunjavanje Zahtjeva za izdavanje porezne kartice

Dio 1 - Podaci o poreznom obvezniku: U svako polje upisuje se traženi podatak. U polje 4) – (JMB) za poreznog obveznika rezidenta Federacije iz člana 2. st. (3) i/ili (4) Zakona, a unosi se trinaestocifreni jedinstveni matični broj, a za poreznog obveznika – stranca sa statusom rezidenta u ovo polje unosi se broj koji dodjeljuje Porezna uprava nakon registracije tog stranog lica. U polje 5) (adresa prebivališta) upisuje se ulica i broj (prema CIPS-ovoj prijavnici). U polje 6) upisuje se općina na području koje se nalazi adresa prebivališta. U polje 7) unosi se datum rođenja poreznog obveznika – (na pr. 01. maj 1975) upisuje se: 01 / 05 / 1975. U zavisnosti da li je podnositelj zahtjeva «zaposlen» ili «nezaposlen» stavit će oznaku "x" u odgovarajuće polje 11.

Dio 2 - Podaci o poslodavcu: Unosi se naziv i JIB / JMB poslodavca / isplatioca kod kojeg je podnositelj zahtjeva trenutno zaposlen, odnosno kojem će predati svoju poreznu karticu. Ukoliko podnositelj Zahtjeva nije u radnom odnosu ili u momentu podnošenja ovog zahtjeva obavlja neku od samostalnih djelatnosti, u odgovarajuće polje broj 11. stavit će oznaku "x".

Dio 3 – Podaci o izdržavanom bračnom drugu: Unose se podaci o bračnom drugu ako se isti, u smislu člana 24. st. 3. i 5. Zakona, može smatrati izdržanim članom uže porodice. Ukoliko je iznos vlastitog mjesečnog prihoda bračnog druga veći od mjesečnog iznosa osnovnog ličnog odbitka (300,00 KM), bračni drug se ne smatra izdržanim članom uže porodice te se u ovaj dio podaci ne unose odnosno sve kolone označavaju se sa "0".

U kolonu c) unosi se iznos vlastitih prihoda bračnog druga, ukoliko je isti manji od iznosa osnovnog godišnjeg ličnog odbitka. U kolonu d) unosi se procenat 100%, ako bračnog druga obveznik izdržava sam, a ukoliko istog izdržava dva ili više lica unosi se procenat koji otpada na poreznog obveznika koji podnosi zahtjev za poreznu karticu. U kolonu e) unosi se pojedinačni koeficijent ličnog odbitka za izdržavanje bračnog druga "0,5".

Dio 4 – Podaci o izdržavanoj djeci: U ovom dijelu unose se podaci o djeci koja se, prema odredbama člana 24. st. 3. i 5. Zakona, mogu smatrati izdržanim članovima uže porodice. Način popunjavanja kolona je isti kao u dijelu 4., s tom razlikom što se u kolonu a) uvijek unose podaci o izdržavanoj djeci po istom redoslijedu (od najstarijeg do najmlađeg). Za prvo ili jedino dijete koje obveznik sam izdržava, u kolonu d) unosi se procenat 100%, a u kolonu e) pojedinačni faktor 0,5. Za drugo dijete pojedinačni faktor iznosi 0,7 za treće i svako daljnje dijete po 0,9. Ukoliko navedenu izdržavanu djecu izdržavaju oba roditelja u omjeru 50% – 50% ili u nekom drugom omjeru, tada se u kolonu d) podnosioca zahtjeva za izdavanje porezne kartice unosi procenat izdržavanja tog djeteta koji se odnosi na podnosioca Zahtjeva, a u kolonu e) koeficijent koji odgovara tom udjelu u izdržavanju tog djeteta (na pr. ako je taj omjer 50% – 50% u kolonu e) kod prvog, najstarijeg djeteta iznosi 0,25, ako je taj omjer 30% – 70% koeficijent će biti 0,15, ako je omjer 75% – 25% koeficijent će biti 0,375 itd.) Kod udjela u izdržavanju drugog djeteta postupa se na isti način s tim što se koeficijent utvrđuje podjelom koeficijenta 0,7, a kod trećeg i svakog daljnjeg djeteta dijeli se koeficijent 0,9 u odgovarajućem omjeru iz kolone d).

U ovaj dio Zahtjeva ne unose se podaci o djeci koja sa podnosiocem Zahtjeva žive u zajedničkom domaćinstvu, a koja imaju vlastite mjesečne prihode veće od 300,00 KM (na pr. plaću, penziju, invalidske dodatke, alimentaciju i ili druga lična primanja), jer se u tom slučaju ta djeca ne smatraju izdržanim članovima uže porodice.

Dio 5 – Podaci o ostalim izdržanim članovima uže porodice: U ovaj dio unose se podaci o licima koja žive u zajedničkom domaćinstvu sa poreznim obveznikom, a koja se shodno odredbama člana 24. st. 3. i 5. Zakona mogu smatrati izdržanim licima. Podaci se unose na isti način kao i u dijelu 4. i 5. s tom razlikom što se u posljednju kolonu za svakog izdržanog člana uže porodice koje obveznik sam izdržava, unosi pojedinačni faktor 0,3. U koloni f) može se iskazati manji koeficijent od 0,3 a koji će odgovarati omjeru naznačenom u koloni e) ukoliko podnositelj zahtjeva za izdavanje porezne kartice sudjeluje u izdržavanju navedenog lica u naznačenom omjeru sa drugim licem koje živi sa podnosiocem u zajedničkom domaćinstvu. U ovom dijelu ne unose se podaci o članovima uže porodice koji imaju vlastite mjesečne prihode veće od mjesečnog iznosa osnovnog ličnog odbitka (300,00 KM), jer se u tom slučaju ne smatraju drugim izdržanim članovima uže porodice.

Dio 6 – Podaci o izdržanim licima za koja obveznik plaća alimentaciju: U ovaj dio unose se podaci o licima – srodnicima po pravoj liniji (dijete/ca i/ili bivši suprug/a). Podnositelj Zahtjeva u ovom dijelu u kolonu f) unosi odgovarajući koeficijent 0,5 ako se radi o alimentaciji koju plaća bivšoj supruzi / gu kao i za alimentaciju koju plaća za jedno dijete, odnosno koeficijent 0,7 ako se radi o alimentaciji koju plaća i za drugo dijete, odnosno koeficijent 0,9 ako se radi o alimentaciji koju plaća i za treće dijete itd.

Napomena: Ukoliko bivši suprug/a sa kojim u zajedničkom domaćinstvu žive djeca iz braka sa licem koje za svoju djecu iz bivšeg braka plaća alimentaciju, i sama ostvaruje oporezivi dohodak od kojeg izdržava sebe i svoje članove uže porodice, u Zahtjevu za izdavanje porezne kartice, u dijelu 5. kao izdržavane članove uže porodice može navesti i djecu koja primaju alimentaciju samo ukoliko mjesečni iznos alimentacije po svakom djetetu nije veći od 300,00 KM odnosno ukoliko pored alimentacije djeca imaju i druge vlastite prihode koji zajedno sa alimentacijom iznose više od

300,00 KM mjesečno. Ukoliko je mjesečni iznos alimentacije, računajući i eventualne druge redovite mjesečne prihode djeteta/ce, manji od 300,00 KM, tada se, shodno odredbama člana 24. stav 4. Zakona, lični odbitak za to dijete/cu ravnomjerno raspoređuje u omjeru 50% – 50%, ukoliko se roditelji odnosno staratelji drugačije ne dogovore.

Dio 7 – Podaci o izdržavanim članovima uže porodice sa invaliditetom uključujući i poreznog obveznika: U ovaj dio unose se podaci o izdržavanim licima iz djelova 3, 4., 5. i 6. kojima je od strane ovlaštene zdravstvene komisije utvrđena invalidnost, uključujući i poreznog obveznika – podnosioca zahtjeva. U kolonu e) za svako izdržavano lice sa invaliditetom unosi se koeficijent 0,3. Ukoliko se radi o izdržavanom članu uže porodice sa prijavljenim udjelom u izdržavanju naznačenom u odgovarajućoj koloni dijela 4, 5. i 6. ovog obrasca, koeficijent 0,3 se dijeli u iskazanom omjeru.

U dijelove od 3. do 7. kolone a) unosi se trinaestocifreni jedinstveni matični broj izdržavanih lica, a za izdržavana lica – strance u ovu kolonu unosi se broj koji će dodijeliti Porezna uprava nakon registracije tih stranih lica.

U drugi red ovog dijela unosi se podatak o datumu od kojeg se može primjenjivati ukupan koeficijent za utvrđivanje iznosa ličnog odbitka za koji se može poreznom obvezniku umanjivati tokom poreznog perioda osnovica za obračun mjesečnih akontacija poreza na dohodak od nesamostalne djelatnosti kao i za utvrđivanje ukupnog godišnjeg iznosa ličnog odbitka po isteku poreznog perioda za koji se može umanjiti godišnja osnovica za obračun poreza na dohodak za protekli porezni period.

Dio 8 – Podaci o ukupnom koeficijentu ličnog odbitka i datumu važenja istog: U ovom dijelu u krajnju desnu kolonu / kolona e) / unosi se podatak o ukupnom koeficijentu ličnog odbitka koji ustvari čini zbir svih pojedinačnih koeficijenata iz krajnje desne kolone iz dijelova 3, 4, 5, 6. i 7. i koeficijenta osnovnog ličnog odbitka / 1,0 /

Dio 9 – Izjava poreznog obveznika: Potpis podnosioca Zahtjeva za izdavanje porezne kartice znači da su prema njegovom saznanju i vjerovanju podaci navedeni u Zahtjevu i priložena dokumentacija na osnovu koje su podaci uneseni, u cijelosti tačni i vjerodostojni. "

Član 24.

U dijelu 2. tabelarnog dijela "Uputstva za sačinjavanje i podnošenje mjesečnog izvještaja MIP-1023", koji je sastavni dio obrasca "Mjesečni izvještaj o isplaćenim plaćama, ostvarenim koristima i drugim oporezivim prihodima zaposlenika od nesamostalne djelatnosti, plaćenim doprinosima i akontaciji poreza na dohodak", u tekstu treće kolone pod rednim br. 11, 13 i 14, riječi: "unosi se nula", brišu se.

Član 25.

Ovaj Pravilnik stupa na snagu narednog dana od dana objavljivanja u "Službenim novinama Federacije BiH", kada će početi i primjena istog osim odredbi koje se ovim Pravilnikom brišu ili mijenjaju, a odnose se na dosadašnji porezni tretman i način oporezivanja i plaćanja poreza na dobitke ostvarene učešćem u igrama na sreću i nagradnim igrama, koje će stupiti na snagu i početi se primjenjivati, shodno odredbi člana 12. Zakona o izmjenama i dopunama Zakona o porezu na dohodak ("Službene novine Federacije BiH", broj 7/13), nakon stupanja na snagu federalnog Zakona o igrama na sreću.

Broj 05-02- 966-3/11
28. marta 2013. godine
Sarajevo

MINISTAR
Ante Krajina